

Was merr su babbeld

Honnes? Honnes?
Was iss?
Ei wo bissde donn?
Im Keller. Isch kumm gleich enuff.
Was hosden im Keller gemacht?
Ebbes gesucht.
Unn, hosdes gefunne?
Naa.
Was hosde donn gesucht?
Su enn Schlissel.
Was donn fern Schlissel?
Ooner zum Uffschließe.
Was willsden uffschließe?
De blecherne Werkzeichschronk.
Den neie? Unn den kriehsde nitt uff?
Naa.
Unn warum nitt?
Isch finn de Schlissel nitt.
Wie, du finnst de Schlissel nitt?
Weil de Schlissel iss doo droi.
Wo droi?
Im Werkzeichschronk.
Dess kabier ich nitt.
Was kabiersde nitt?
Wie enn Schlissel zum Uffschließe ...
...in de Schronk kimmt den isch uffschließe will.
Genau.
Dess Schloss iss onnersders gebaut.
Wie onnersders gebaut?
Wennde die Dier zudrigge dust, brauchdsde ...
... enn Schlissel zum Uffschließe. Schee!
Schee, werklisch schee.
Awwer wer hodden die Dier zuggedriggd?
Isch werns gewese soi.
Unn jetzt?
Wollt isch dess Schloss uffbohrn.
Ja, mach dess unn bau e onner Schloss oi.
Awwer isch konns nitt uffbohrn.
Ei warum donn nitt?
Die Bohrer sinn aach im Schronk.
Jetzt awwer ebbes onnersders.
Ei was donn?
Doo duts bestimmt noch mieh Schlissel gewwe.
Isch glaab, noch zwaa.

Unn wo sinnen die, aach im Schronk?
Naa, die missde wo onnersders soi.
Ei doo gugge merr mol.
Wo willsden gugge?
Ei im Keller.
Doo habb isch schunn iwverall gesucht.
Gugg emol in doiner Krempelschublad.
Doo habb isch aach schunn geguggd.
Unn, nix gefunne?
Naa.
Isch gebb derrn Tipp.
No?
Bet zum heilische Antonius, der dut helfe.
De heilische Antonius aus Padua in Italien?
Ja, de heilische Antonius aus Padua
Dess iss gut.
Ei warum donn?
Weil isch jetz waaß wo die zwaa Schlissel sinn.
Unn wo sinnse?
Hier sinnse. Jetz kann isch uffschließe.
Unn wo warnse?
Schee versteckeld in dere alde Pizzaschachtel.

Eiern Honnes